



Komunikadu Imprensa
18 Marsu 2024

**Problema abandona família sai preokupasaun comunidade Aldeia
Lebudu, Ermera, iha atividade dezamina informasaun JSMP nian**

Iha 08 Marsu 2024, JSMP dezamina informasaun ba Autoridade Lokal sira no comunidade sira hosi Aldeia Lebudu, Suku Deleso, Postu Administrativu Railako, Munisípiu Ermera, atividade ne'e realiza iha Sede Suku Deleso.

Objetivu hosi dezamina informasaun ne'e atu hasa'e konesimentu lideransa komunitaria no membru comunidade sira-nian koñesimentu kona-ba, direitu umanu, definisaun hosi lei, tipu hosi krime sira, Violénsia Bazeia ba Jéneru (VBJ), serbisu hosi rede referral nian no asesu ba justisa formál.

“JSMP konsidera informasaun sobre asesu ba justisa formál importante ba comunidade no estrutura sira aldeia, ne'ebé hela iha área rurál atu bele hatene no kompriende di'ak hodi nune'e bele fasilita sira atu rezolve sira nia problema no prosesu sira nia kazu bainhira akontese tantu iha nivel komunitária no nivel nasional,” dehan Sra. Ana Paula Marçal, Diretora Ezekutiva JSMP.

Iha dezaminasaun informasaun ne'e, partisipante sira hato'o sira-nia preokupasaun kona-ba problema abandona oan no família (feen). Hatan ba preokupasaun ne'e, JSMP informa katak bainhira rona, haree no sente bele hato'o keixa ba iha Ministériu Públiku nu'udar representa menór atu bele toma prosesu hodi bele asegura direitu alimentár ba menór, alende ne'e JSMP mós bele ajuda atu akompañia nia prosesu kazu ne'e nune'e menór sira bele hetan sira ninia direitu, importante mak dokumentu hosi labarik no inan-aman nian.

Iha parte seluk, partisipante sira mós preokupa kona-ba kazu sira ne'ebé prosesu kleur iha Ministériu Públiku no Tribunál. Relasiona ho preokupasaun ne'e, JSMP esplika katak prosesu kleur ne'e dalaruma akontese tanba ministériu públiku presiza tan evidénsia balun atu bele kompleta ninia akuzasaun, antes haruka ba tribunál. Dalaruma mós tarde atu halo prosesu julgamentu, tanba menus rekursu tanba kazu ne'ebé ninia prosesu to'o iha tribunál ne'e la'os kazu ida rua de'it, maibé kazu barak no ita hotu hatene katak ita ninia juis oituan hela, nune'e labele rezolve kazu sira ho lalais. Ho serbisu hamutuk ba projetu ida ne'e, JSMP sei akompañia ita bo'ot sira ne'ebé ninia kazu sira prosesa ona liuhosi dalan tribunál nian, liuhosi konfirma andamentu kazu sira iha polisia, ministériu públiku no tribunál.

Iha dezaminasaun informasaun ne'e, membru comunidade sira mós hato'o preokupasaun kona-ba kapturasaun ilegál sira hosi polisia sein iha karta mandadu kapturasaun. Hatan ba preokupasaun ne'e, JSMP esplika katak kona-ba kapturasaun sein mandadu hosi tribunál ne'e Lei konsidera ne'e ilegál, tanba prosedimentu loloos tuir Lei mak kapturasaun sein mandadu ne'e so aplika deit ba iha krime sira “*Flagrante delicto*” ka kaer ho liman.

JSMP mos informa ba komunidadade sira katak knaar prinsipál hosi instituisaun judisiál sira ne'e mak garantia prosesu justisa ne'ebe justu ba ema hotu iha kualkér kazu sira tantu kazu krime ka kazu sivíl ne'ebé ninia prosesu ba to'o iha tribunál.

Partisipante ne'ebé partisipa iha dezaminasaun informasaun ne'e hamutuk na'in 26, kompostu hosi mane 16 no feto 10. Partisipante sira ne'e mak hanesan estrutura aldeia, xefe aldeia, xefe suku, xefe juventude feto no mane, delegadu no delegada, komunidadade inklui lia-na'in.

Atividade ne'e, realiza hosi JSMP, liuhosi Programa Apoiu Seguransa Komunitáriu (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor-Leste.

Atu hetan informasaun kompleitu, favor kontaktu:

Ana Paula Marcal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl